

«ՀՀ Արմավիրի մարզպետ Աշոտ Ղահրամանյանի շնորհավորական խոսքը Հայրենական մեծ պատերազմում տարած հաղթանակի 70-րդ և Շուշիի ազատագրման 23-րդ տարեդարձերի կապակցությամբ»

«Սիրելի բարեկամներ, այս բացառիկ տոնակատարության հարգելի մասնակիցներ. Նախ և առաջ բոլորիդ սրտանց շնորհավորում եմ երկրորդ աշխարհամարտում տարած պանծալի հաղթանակի 70-ամյակի և Շուշիի ազատագրման 23-րդ փառավոր տարեդարձերի կապակցությամբ:

Աշխարհին է հայտնի, որ Հայրենական մեծ պատերազմում տարած պատմական հաղթանակն ու փառքը ձեռքբերվեցին նախկին Խորհրդային Միության ժողովուրդների միասնական կամքի, ֆաշիզմի դեմ իրենց կուրծքը վահան դարձրած մեր հայրերի ու պապերի սխրանքների, նրանց ցուցաբերած արիության շնորհիվ:

Որքան էլ ժամանակը հեռանում է 1941-1945 թվականների ճակատագրական ահեղ իրադարձություններից, նույնքան ավելի ու ավելի է արժևորվում Հայրենական Մեծ պատերազմի կրակե բոցերից փրկված խաղաղությունը: Իսկ այն առաջին հերթին իրական դարձավ նախկին Խորհրդային Միության բազմազգ ժողովուրդների միասնական կամքի, նրանց սխրանքների հերոսացման և միլիոնավոր մարդկանց կյանքի գնով: Ֆաշիստական դարչնագույն հրեշի ճանապարհին կանգնեց ռուս ժողովուրդը, նրա կողքին էին նաև նախկին սովետական երկրի շուրջ 60 ազգերի ինքնամոռաց զավակներ, այդ թվում՝ Հայոց մեծ երկրի հազարավոր արծիվներ:

Մենք այսօր հպարտ ենք և երախտապարտ բոլոր նրանց, ովքեր հանուն ազատ ապրելու, հանուն մարդասիրական մեծ գաղափարների և հանուն երկիր մոլորակի համընդհանուր խաղաղության, չխնայեցին ամենաթանկը՝ իրենց կյանքը:

Մայիսի 9-ի մեծագույն հաղթանակների ոսկեշղթան արդեն 70-րդ անգամ է զարդարում այն իմաստնությունը, որ արդարության համար կովի ելած համաժողովրդական ալիքի դեմ չի կարող դիմանալ ոչ մի արգելք, որ բոլոր պատնեշները խորտակվելու են, երբ հավաքական ուժը դառնում է հող-հայրենիի պաշտպանության բացառիկ նպատակ: Այս ճանապարհին Մեծ հայրենականի տարեգրության մեջ Կովկասի նախալեռներից մինչև Բելոլին հասան նաև հայ ժողովրդի քաջազուն զավակները, նրանց թվում ունեցանք մարշալներ, 100-ից ավելի հերոսներ, զորավարներ, նրանց հետ նաև մահ ու կենաց կովի ելած հազարավոր զինվոր տղաներ, ովքեր իրենց սուրը փառքով դրեցին պատյան:

Այսօր մենք հպարտ ենք նաև, որ մայիսյան տոների շարքում է Շուշիի ազատագրումը: Մեր ժողովուրդը տիրոջ իրավունքով և հպարտությամբ է նշում հայոց մտքի ու զենքի փառավոր այդ հաղթանակը:

Հարգելի բարեկամներ, գլուխ խոնարելով Մեծ հայրենականում զոհվածների փառքի և հիշողության առջև, միաժամանակ մեր գնահատումի և նվիրումի խոսքն ենք հղում բոլոր վետերաններին. Շնորհակալություն Ձեզ աշխարհաշեն Ձեր սխրանքների համար:

Ուրեմն շնորհավորենք բոլորիս, որ այսօր ականատես ենք մայիսյան պանծալի հաղթանակների տարեդարձներին: Ծափահարենք այս հրապարակում խրոխտ շարքերով կանգնած ռուսական և հայկական բանակների միասնական զորահանդեսի մասնակիցներին, ովքեր մեր երկու ժողովուրդների բարեկամությամբ, միշտ ուս ուսի՝ կայուն խաղաղության հուսալի պաշտպաններ են:

Կեցցե ժողովուրդների բարեկամությունը:

Հավերժ փառք, լուսավոր նպատակների համար իրենց կյանքը տված արժանի այն սերունդներին, ովքեր մեզ հաղթանակներ պարգևեցին, կյանքի գնով կերտեցին իրենց բաժին խաղաղությունը և դարձան հավեժի ճամփորդներ»: